

*Čitluk, 04.03.2015. godine
Broj: 154/15*

**ZAPISNIK I ZAKLJUČCI SA SEDME SJEDNICE PREDSJEDNIŠTVA
SKUPŠTINE SAVEZA OPĆINA I GRADOVA
FEDERACIJE BOSNE I HERCEGOVINE**

U Općini Čitluk je dana 04.03.2015. godine održana Sedma sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Saveza pisustvovali su:

1. g-din Husejin Smajlović, gradonačelnik Grada Zenica, predsjednik Predsjedništva Saveza;
2. g-din Edin Smajić, načelnik Općine Vogošća;
3. g-din Emir Bubalo, načelnik Općine Konjic;
4. g-din Muhamed Ramović, načelnik Općine Goražde;
5. g-din Asim Mekić, načelnik Općina Busovača;
6. g-din Ljubo Grizelj, načelnik Općine Grude;
7. g-din Ivo Jerkić, načelnik Općine Čitluk;
8. g-din Ivan Vukadin, načelnik Općine Tomislavgrad;
9. g-din Nedžad Koldžo, načelnik Općine Novo Sarajevo.

Pored gore navedenih sjednici su prisustvovali i: g-din Smiljan Vidić, načelnik Općine Čapljina i zamjenik predsjedavajućeg Skupštine Saveza, g-din Srećko Mikulić, šef Odjela za društvene djelatnosti u Općini Grude, g-din Predrag Šupljeglav, pomoćnik gradonačelnika Grada Mostara, g-đa Alma Zukorlić, Švicarska ambasada, g-din Mario Vignjević, Sida, g-đa Vesna Travljanin, direktor Saveza, g-đa Zlata Turkić, viši saradnik za rad sa skupštinskim komisijama i institucijama vlasti, g-đa Šejla Hasić, viši saradnik za projekte-projekt menadžer, g-din Amir Kupusija, viši saradnik za informisanje i odnose sa javnošću i g-đa Selma Fišek, viši saradnik za pravna pitanja.

G-din Husejin Smajlović je otvorio sjednicu i predložio dnevni red kako slijedi:

1. Predstavljanje novih članova Predsjedništva Skupštine Saveza općina i

gradova Federacije BiH (Općina Kalesija i Općina Domaljevac-Šamac)

2. Zapisnik i Zaključci sa Šeste sjednice Predsjedništva Skupštine Saveza općina i gradova Federacije BiH
3. Odluka o rotaciji predsjednika i zamjenika predsjednika Predsjedništva Skupštine Saveza općina i gradova Federacije BiH
4. Prezentacija i diskusija o nacrtu Strateških dokumenata Saveza općina i gradova Federacije BiH
Izjavitelj: Šejla Hasić, viši saradnik za projekte - projekt menadžer
5. Zapisnik i zaključci sa sjednice Nadzornog odbora Saveza općina i gradova Federacije BiH (Polugodišnji izvještaj) kao i daljnje aktivnosti
Izjavitelj: Admir Hadžiemrić, predsjednik Nadzornog odbora
6. Zabilješka sa sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša
Izjavitelj: Zlata Turkić, viši saradnik za rad sa skupštinskim komisijama i institucijama vlasti
7. Nastavak aktivnosti Saveza po pitanju izuzimanja jedinica lokalne samouprave od otplate duga prema Međunarodnom monetarnom fondu
Izjavitelj: Vesna Travljanin, direktor Saveza
8. Zakonodavne aktivnosti:
 - a) Zahtjev Općine Konjic za zaštitu prava na lokalnu samoupravu u vezi sa Zakonom o električnoj energiji
Izjavitelj: Emir Bubalo, načelnik Općine Konjic
 - b) Javna rasprava o nacrtu Zakona o premjeru i registraciji nekretnina
Izjavitelj: Selma Fišek, viši saradnik za pravna pitanja
9. Aktivnosti Saveza na projektima:
 - a) Informacija o nastavku saradnje sa UNDP-om na projektima: MTS, LOD i ILDP
Izjavitelj: Šejla Hasić, viši saradnik za projekte - projekt menadžer
 - b) Projekat „Jačanje integriteta u lokalnim samoupravama“ - saradnja sa Transparency International BiH
Izjavitelj: Vesna Travljanin, direktor Saveza
 - c) Projekat „Prikupljanje podataka o čvrstom otpadu u jugoistočnoj Evropi“;
 - d) Projekat „Upravljanje imovinom za sektor vodosnabdijevanja i odvodnje u jugoistočnoj Evropi“
 - e) Projekat „Lokalni dužnosnici jugoistočne Evrope: vodstvo za promjenu“
 - f) Projekat „Energetska efikasnost u udruženjima općina“
Izjavitelj: Amir Kupusija, viši saradnik za informisanje i odnose sa javnošću

10. Informacije o:

- a) Odgovor Skupštine Zeničko-dobojskog kantona i Federalnog ministarstva zdravstva na inicijativu Saveza za mogućnost liječenja građana Općine Breza u Kantonu Sarajevo
Izjavitelj: Selma Fišek, viši saradnik za pravna pitanja
- b) Molba Saveza prema Federalnom ministarstvu finansija za pomoć u vezi sa blokadom računa Općine Vareš
Izjavitelj: Vesna Travljanin, direktor Saveza
- c) Izvještaj o radu Radne grupe za energetska efikasnost
Izjavitelj: Amir Kupusija, viši saradnik za informisanje i odnose sa javnošću
- d) Imenovanje predstavnika Saveza u Upravni odbor projekta „Smanjenje neobračunate vode u jugoistočnoj Evropi“
- e) Nagrada za najbolje prakse o uključivanju žena i mladih u lokalni život
Izjavitelj: Amir Kupusija, viši saradnik za informisanje i odnose sa javnošću

11. Prijedlog za sazivanje sjednice Skupštine Saveza

Izjavitelj: Vesna Travljanin, direktor Saveza

12. Tekuća pitanja

- a) Izmjena predstavnika Saveza u Savjetu Federalnog fonda za pomoć poplavljenim područjima (Željko Josić) i izmjena predstavnika Saveza u Upravnom odboru projekta hitnog oporavka od poplava u BiH (Rasim Omerović)
Izjavitelj: Vesna Travljanin, direktor Saveza
- b) Pravilnik o postupku direktnog sporazuma vezano za Zakon o javnim nabavkama
Izjavitelj: Selma Fišek, viši saradnik za pravna pitanja

Predsjedništvo je jednoglasno usvojilo predloženi dnevni red.

Zatim je g-din Husejin Smajlović konstatovao da su izabrani novi načelnici općina Kalesija i Domaljevac – Šamac koji su postali novi članovi Predsjedništva Saveza.

1. Zapisnik i Zaključci sa Šeste sjednice Predsjedništva Skupštine Saveza općina i gradova Federacije BiH

Zapisnik i Zaključci sa Šeste sjednice Predsjedništva Skupštine Saveza općina i gradova Federacije BiH su jednoglasno usvojeni.

2. Odluka o rotaciji predsjednika i zamjenika predsjednika Predsjedništva Skupštine Saveza općina i gradova Federacije BiH

G-din Husejin Smajlović je istakao da je u skladu sa Statutom Saveza došlo do rotacije na mjestu predsjednika Saveza, te je čestitao novom predsjedniku g-dinu Ivi Jerkiću i poželio mu uspjeh u radu uz konstataciju da je pred Savezom mnogo posla.

G-din Ivo Jerkić se zahvalio na čestitkama, te je preuzeo predsjedavanje i vođenje sjednice.

Predsjedništvo Saveza je jednoglasno usvojilo Odluku o rotaciji predsjednika i zamjenika predsjednika Predsjedništva Skupštine Saveza općina i gradova Federacije BiH.

3. Prezentacija i diskusija o nacrtu Strateških dokumenata Saveza općina i gradova Federacije BiH

G-đa Šejla Hasić se članovima Predsjedništva zahvalila na izdvojenom vremenu i navela da Savez ima Strateški plan koji je još uvijek na snazi, ali da je potrebno pristupiti izradi novog zbog povećanog obima poslova. Napomenula je da se na izradi novih strateških dokumenata radi uz finansijsku pomoć Kraljevine Švedske i Međunarodne agencije za razvojnu saradnju - Sida. Također je navela da su u procesu izrade strateških dokumenata održane i zajedničke radionice sa Savezom opština i gradova Republike Srpske, te najavila da će u narednom periodu biti održane četiri radionice na kojima će se predstavnici jedinica lokalne samouprave imati priliku upoznati sa novim strateškim dokumentima Saveza i na iste dati svoje komentare i sugestije, a sve u cilju izrade što kvalitetnijih dokumenata. U svom daljem izlaganju, g-đa Šejla Hasić je detaljnije obrazložila način i metodologiju izrade strateških dokumenata, kao i načela, misiju, viziju, programske oblasti, strateške ciljeve i pravce razvoja funkcija Saveza.

Prezentacija nacrta strateških dokumenata Saveza općina i gradova Federacije BiH za period 2015. – 2019. godine čini sastavni dio ovog zapisnika i nalazi se u prilogu istog.

G-đa Šejla Hasić je dodala da su nam vrlo bitni stavovi članova Predsjedništva kao i stavovi članica Saveza po pitanju strateških dokumenata Saveza. Također je istakla da je u materijalima za ovu sjednicu Predsjedništva dostavljena gruba verzija nacrta Akcionog plana Saveza za period 2015-2016 godina kako bi se

Predsjedništvo upoznalo sa istim te je istakla ključne elemente nacrtu Akcionog plana Saveza.

Ukratko je izvjestila o budućim koracima (radionice, finalizacija paketa nacrtu strateških dokumenata i izrada pravilnika i nove organizacione strukture Saveza).

G-din Ivo Jerkić se zahvalio g-đi Šejli Hasić na prezentaciji i pozdravio je predstavnike Švicarske agencije za razvoj i saradnju - SDC i Švedske međunarodne agencije za razvoj - Sida i zahvalio im se u ime Saveza na podršci koju pružaju.

G-đa Vesna Travljanin je predložila da se, ukoliko žele, skupu obrate i predstavnici donatora.

G-din Mario Vignjević je naveo da će ubrzo početi implementacija novog projekta koji će zajednički finansirati SDC i Sida i da će to biti direktna pomoć savezima, a kroz to i jačanje usluga prema članstvu. Istakao je da je prema strategiji Švedske vlade i dalje u fokusu lokalna samouprava u Bosni i Hercegovini i njeno jačanje.

G-đa Alma Zukorlić je navela da je dobro da imamo kvalitetne komentare i diskusiju u cilju izrade što boljih i kvalitetnijih strateških dokumenata.

G-din Emir Bubalo ističe da problem predstavlja neimplementacija Zakona o principima lokalne samouprave u Federaciji BiH koji je usvojen 2006. godine. Istakao je da se ne poštuju presude Ustavnog suda Federacije BiH i kao primjer naveo Zakon o osnovnom odgoju i obrazovanju Hercegovačko-neretvanskog kantona i oblast zdravstva gdje se općinama nameću obaveze bez prenosa finansijskih sredstava. Dodao je da smo došli u situaciju da neke općine ne mogu funkcionisati, a od istih se traži da rješavaju sve probleme. Konstatovao je da je problem i Zakon o premjeru i registraciji nekretnina.

G-din Ivo Jerkić je uputio pozdrave g-dinu Nedžad Koldži koji se priključio sjednici. Složio se da zaista postoji problem kod provedbe presuda Ustavnog suda Federacije BiH i da je vrlo bitno da Savez bude uključen u proces donošenja zakona.

G-din Asim Mekić je istakao da je ovo dobar dokument i da ga Predsjedništvo Saveza treba podržati, te da bi trebalo dodati i pitanje prenošenja nadležnosti

jedinicama lokalne samouprave od strane viših nivoa vlasti. Dodao je da je interes jedinica lokalne samouprave da joj se vrata određene nadležnosti npr. u oblasti inspekcija.

G-din Emir Bubalo je naveo problem gomilanja administracije.

G-din Edin Smajić je naveo da će predložiti da načelnici općina iz Kantona Sarajevo održe zajednički sastanak na kojem bi prodiskutovali strateške dokumente Saveza i dali komentare na iste i na taj način doprinijeli usvajanju kvalitetnih dokumenata na predstojećoj Skupštini Saveza. Istakao je da bismo se trebali pokušati izboriti kao Savez da lokalna samouprava i Savez dobiju jednu značajniju ulogu. Smatra da je možda oblast međunarodnih integracija prilika da se kroz nju pokušaju riješiti određena pitanja. Naveo je da se općinama konstantno prenose nadležnosti.

G-din Nedžad Koldžo je istakao da nam možda i ne trebaju strateški dokumenti, jer mi uvijek kaskamo za vremenom. Naveo je da nam trebaju svega dvije ključne stvari, a to su: provedba Evropske povelje o lokalnoj samoupravi i zahtjev za ultimativno formiranje Ministarstva za lokalnu samoupravu u Vladi Federacije BiH. Smatra da je nerealno očekivati od Saveza da ispravlja sve krive stvari.

G-din Ivo Jerkić je podsjetio da smo na nekoj od održanih sjednica Skupštine Saveza usvojili inicijativu za formiranje Ministarstva za lokalnu samoupravu u Vladi Federacije BiH.

G-din Nedžad Koldžo smatra da je sada pravi trenutak da Savez ponovo pokrene tu inicijativu.

G-đa Šejla Hasić se zahvalila g-dinu Nedžadu Koldži na sugestiji za formiranje ministarstva i navela je da ćemo u Strateškom planu apostrofirati punu provedbu Evropske povelje o lokalnoj samoupravi.

G-din Husejin Smajlović je naveo da je ovo najkvalitetniji dokument koji je do sada Savez izradio i izrazio je slaganje sa idejom da se održe radionice sa širim krugom načelnika.

G-din Asim Mekić je naveo da je u principu ovo potreban dokument i da ga je potrebno unaprijediti.

G-đa Vesna Travljanin je konstatovala da ćemo uzeti u obzir sve sugestije i komentare na strateške dokumente.

G-din Emir Bubalo je istakao da bi ubuduće na sjednice Predsjedništva Saveza trebalo pozivati predsjednika Komisije za lokalnu samoupravu Predstavničkog doma Parlamenta Federacije BiH.

G-đa Vesna Travljanin je naglasila da je ostvaren kontakt sa novim predsjednikom Komisije za lokalnu samoupravu Predstavničkog doma Parlamenta Federacije BiH koji je Savezu dao listu zakona na kojima će Predstavnički dom Parlamenta Federacije BiH raditi u narednom periodu.

G-đa Zlata Turkić je napomenula da će vjerovatno krajem marta biti održan sastanak predstavnika Saveza sa članovima Parlamenta Federacije BiH na koji će biti pozvani svi članovi Predsjedništva Saveza.

G-din Ivan Vukadin je istakao da je ovaj dokument potreban Savezu i da na sjednici Skupštine Saveza, gdje će biti prisutni svi načelnici, treba zahtijevati formiranje Ministarstva za lokalnu samoupravu u Vladi Federacije BiH. Zahvalio se predstavnicima donatora na pomoći i predložio da se usvoje strateški dokumenti.

G-din Husejin Smajlović se složio da Predsjedništvo Saveza treba usvojiti strateške dokumente.

G-din Ivo Jerkić je predložio da se Stručnoj službi Saveza dostave komentari i sugestije na nacrt strateških dokumenata i dao iste na glasanje.

Predsjedništvo Saveza je uz jedan „Suzdržan“ glas i osam glasova „Za“, usvojilo nacrt Strateškog plana Saveza za period 2015.-2019. godina i nacrt Akcionog plana Saveza za period 2015.-2016. godina.

4. Zapisnik i zaključci sa sjednice Nadzornog odbora Saveza općina i gradova Federacije BiH (Polugodišnji izvještaj) kao i daljnje aktivnosti

G-đa Vesna Travljanin napominje da je došlo izmjene člana Nadzornog odbora - gospodina Hasana Muratovića koji više nije načelnik Općine Živinice i da u skladu sa Statutom Saveza to mjesto zauzima novoizabrani načelnik. Također je navela da je članovima Predsjedništva dostavljena pismena informacija za ovu tačku. informaciju pismeno.

Predsjedništvo Saveza je jednoglasno usvojilo Zapisnik i zaključke sa sjednice Nadzornog odbora Saveza općina i gradova Federacije BiH (Polugodišnji izvještaj).

5. Zabilješka sa sjednice Komisije za imovinska pitanja, prostorno uređenje,

stambeno-komunalne djelatnosti i zaštitu životnog okoliša

G-đa Zlata Turkić je izvjestila da je na sjednici Komisije bilo puno govora u vezi sa inicijativom Općine Jajce u vezi sa izmjenom Zakona o finansiranju pomoći za otklanjanje posljedica prirodne nesreće i obnovu područja zahvaćenih prirodnom nesrećom. Također je istakla da je Komisija podržala da se u Zakonu o turističkim zajednicama i promicanju turizma da mogućnost da više općina formira zajedničku turističku zajednicu.

G-din Ivo Jerkić je otvorio raspravu po ovoj tački.

G-din Asim Mekić je istakao da treba ozbiljno razmisliti o problemu elementarnih nepogoda i da bi tu oblast trebalo urediti sistemskim zakonom.

G-din Nedžad Koldžo je podsjetio da je u okviru projekta „Načelnici za razvoj“ izrađen tekst Zakona o zaštiti i spašavanju i još dva zakona (Zakon o finansiranju lokalne samouprave i Zakon o međuopćinskoj saradnji), te da bi trebalo lobirati u pravcu da se ovi zakoni nađu u parlamentarnoj proceduri jer se pokazalo da postojeći Zakon o zaštiti i spašavanju nije dobar.

Predsjedništvo Saveza je jednoglasno usvojilo Zabilješku sa sjednice Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša uz zaključke kako slijedi:

- Savez će uputi dopis Vladi Federacije BiH da donese sistemski Zakon o finansiranju pomoći za otklanjanje posljedica prirodne nesreće i obnovu područja zahvaćenih prirodnom nesrećom koji neće biti vezan za određeni period i određeno područje;
- Potrebno je hitno uputiti dopis Vladi Federacije BiH i resornom Ministarstvu zahtjev za donošenje Zakona o turističkim zajednicama i promicanju turizma u Federaciji BiH;
- U cjelosti se podržavaju zaključci sa javnih rasprava u općinama Olovo i Vareš koje treba uputiti Ministarstvu za poljoprivredu, šumarstvo i vodoprivredu Zeničko-dobojskog kantona.

6. Nastavak aktivnosti Saveza po pitanju izuzimanja jedinica lokalne samouprave od otplate duga prema Međunarodnom monetarnom fondu

G-đa Vesna Travljanin je istakla da je Savez uputio opomenu pred tužbu Vladi Federacije BiH iz razloga što nisu uvaženi raniji stavovi i zahtjevi koje je Savez upućivao Vladi Federacije BiH u vezi sa pitanjem otplate kredita prema Međunarodnom monetarnom fondu. Također je navela da bi se Predsjedništvo Saveza trebalo odrediti da li da podignemo tužbu protiv Vlade Federacije BiH.

G-din Husejin Smajlović je istakao da je zadovoljan sa onim što je advokat uradio.

Predsjedništvo Saveza je jednoglasno zaključilo da advokat kojeg je angažovao Savez uputi tužbu Vladi Federacije BiH kojom će se potraživati iznos od 43.336.718 KM za koji su jedinice lokalne samouprave u Federaciji BiH oštećene po osnovu otplate kredita prema Međunarodnom monetarnom fondu za period od 2010. do 2014. godine.

7. Zakonodavne aktivnosti:

a) Zahtjev Općine Konjic za zaštitu prava na lokalnu samoupravu u vezi sa Zakonom o električnoj energiji

G-din Emir Bubalo je naveo da su kroz Zakon o električnoj energiji usvojena određena rješenja koja nisu prošla kroz Zakon o koncesijama.

G-đa Selma Fišek je istakla da Savez ima saznanja da je i Općina Novo Sarajevo Ustavnom sudu Federacije BiH uputila zahtjev za zaštitu prava na lokalnu samoupravu u vezi sa Zakonom o električnoj energiji. Dodala je da je bitno da se Predsjedništvo Saveza odredi da li će Savez uputiti zahtjev Ustavnom sudu Federacije BiH u vezi sa ovim pitanjem u kom slučaju bi bio stranka u postupku.

Nakon rasprave, Predsjedništvo Saveza je dalo podršku Općini Konjic i Općini Novo Sarajevo po pitanju zahtjeva za zaštitu prava na lokalnu samoupravu u vezi sa Zakonom o električnoj energiji.

b) Javna rasprava o nacrtu Zakona o premjeru i registraciji nekretnina

G-đa Selma Fišek je informisala Predsjedništvo da je Savez 06.11.2014. godine u Općini Novi Grad Sarajevo organizirao javnu raspravu o nacrtu Zakona o premjeru i registraciji nekretnina na kojoj je bio prisutan veliki broj predstavnika jedinica lokalne samouprave i gdje su doneseni slijedeći zaključci:

podržava se generalni koncept nacrtu Zakona o premjeru i registraciji nekretnina koji podrazumijeva uspostavu jedinstvene zemljišno-knjižne evidencije u Federaciji Bosne i Hercegovine;

ne podržava se osnivanje kantonalnih uprava za geodetske poslove i registraciju nekretnina predviđenih članom 11. nacrtu Zakona o premjeru i

registraciji nekretnina i davanje nadležnosti istima za poslove neposrednog osnivanja i održavanja registra nekretnina, rješavanja upravnih stvari u prvom stepenu iz svoje nadležnosti, pripremanje srednjoročnih programa i godišnjih planova osnivanja registra nekretnina na kantonalnom nivou, kao i izvještaja o njihovom izvršenju, iz razloga što bi to značilo oduzimanje vlastitih nadležnosti jedinica lokalne samouprave utvrđenih Zakonom o principima lokalne samouprave.

Savez je navedene zaključke uputio Vladi i Parlamentu Federacije Bosne i Hercegovine.

Predsjedništvo Saveza je primilo k znanju informaciju o održanoj javnoj raspravi o nacrtu Zakona o premjeru i registraciji nekretnina.

8. Aktivnosti Saveza na projektima:

a) Informacija o nastavku saradnje sa UNDP-om na projektima: MTS, LOD i ILDP

G-đa Šejla Hasić je istakla da je potpisan grantovni ugovor sa UNDP-om koji se počeo primjenjivati od 1. marta/ožujka 2015. godine. Navela je da je prethodni projekat koji je Savez implementirao u saradnji sa UNDP-om uspješno proveden i ocijenjen.

b) Projekat „Jačanje integriteta u lokalnim samoupravama“ - saradnja sa Transparency International BiH

G-din Amir Kupusija je informisao Predsjedništvo da je potpisan Memorandum o saradnji između Saveza i Transparency International-a BiH u skladu s kojim će Savez dati podršku izradi antikorupcijskih mjera kroz izradu priručnika i planova integriteta u 10 općina u Federaciji BiH.

G-din Nedžad Koldžo je istakao da podržava projekte iako misli da su neki od njih nepotrebni kao što je bio npr. projekat s ciljem jačanja saradnje Saveza sa općinskim/gradskim vijećima. Naveo je da smatra da bi Predsjedništvo trebalo dobiti prijedloge projekata i odrediti se o istima kako se nebi implementirali nepotrebni projekti.

G-đa Vesna Travljanin je istakla da ne možemo prekinuti saradnju sa općinskim/gradskim vijećima, napomenuvši da je završna konferencija projekta sa OSCE-om bila uspješna.

- c) Projekat „Prikupljanje podataka o čvrstom otpadu u jugoistočnoj Evropi“**
- d) Projekat „Upravljanje imovinom za sektor vodosnabdijevanja i odvodnje u jugoistočnoj Evropi“**
- e) Projekat „Lokalni dužnosnici jugoistočne Evrope: vodstvo za promjenu“**

f) Projekat „Energetska efikasnost u udruženjima općina“

G-din Amir Kupusija je ukratko izvjestio da se ovi projekti rade sa NALAS-om i sa ORF-om i da su u iste uključene po dvije općine kroz pilot projekte.

G-din Nedžad Koldžo je tražio pojašnjenje o projektu „Upravljanje imovinom za sektor vodosnabdijevanja i odvodnje u jugoistočnoj Evropi“.

G-din Amir Kupusija je obrazložio da Savez nije direktno uključen u ovaj projekat, nego da je Komisija za imovinska pitanja, prostorno uređenje, stambeno-komunalne djelatnosti i zaštitu životnog okoliša predložila g-dina Nermina Mandru za člana Upravnog odbora ovog projekta.

Predsjedništvo Saveza je usvojilo informacije i podržalo aktivnosti Saveza na navedenim projektima.

9. Informacije o:

a) Odgovor Skupštine Zeničko-dobojskog kantona i Federalnog ministarstva zdravstva na inicijativu Saveza za mogućnost liječenja građana Općine Breza u Kantonu Sarajevo

G-đa Selma Fišek je podsjetila da je Predsjedništvo Saveza na prethodnoj sjednici podržalo inicijativu Općine Breza za mogućnost liječenja građana Općine Breza u Kantonu Sarajevo, te da je Stručna služba Saveza uputila tu inicijativu ispred Saveza na nadležne institucije. Dodala je da je Savez dobio odgovor na inicijativu od strane sekretara Skupštine Zeničko-dobojskog kantona u kojem je, između ostalog, navedeno da Skupština očekuje izjašnjenje Vlade Zeničko-dobojskog kantona u vezi sa ovom inicijativom. Također je navela da je i Federalno ministarstvo zdravstva dostavilo svoj odgovor gdje je, između ostalog, navedeno će Federalno ministarstvo zdravstva imati u vidu ovu inicijativu prilikom izrade novog Zakona o zdravstvenom osiguranju, a u cilju postizanja optimalnih rješenja u oblasti zdravstvenog osiguranja.

Predsjedništvo Saveza je usvojilo ovu informaciju.

b) Molba Saveza prema Federalnom ministarstvu finansija za pomoć u vezi sa blokadom računa Općine Vareš

G-đa Vesna Travljanin je izvjestila da je Savez uputio molbu Federalnom

ministarstvu finansija s ciljem rješavanja problema blokade računa Općine Vareš.

Predsjedništvo Saveza je usvojilo ovu informaciju.

c) Izvještaj o radu Radne grupe za energetska efikasnost

G-din Amir Kupusija je naveo da je došlo do proširenja Radne grupe za energetska efikasnost sa predloženim članovima, te da je naziv „Radna grupa“ izmijenjen u „Savjet“.

Predsjedništvo Saveza je usvojilo Izvještaj o radu Radne grupe za energetska efikasnost.

d) Imenovanje predstavnika Saveza u Upravni odbor projekta „Smanjenje neobračunate vode u jugoistočnoj Evropi“

G-din Amir Kupusija je u okviru svog ranijeg izlaganja naveo da je g-din Nermin Mandra član Upravnog odbora ovog projekta ispred Saveza.

e) Nagrada za najbolje prakse o uključivanju žena i mladih u lokalni život

G-din Amir Kupusija je izvjestio da je na osnovu raspisanog konkursa u saradnji sa NALAS- om za dodjelu nagrada najboljim praksama na području uključivanja žena i mladih u život lokalne zajednice prijavljeno ukupno 56 dobrih praksi iz lokalnih zajednica jugoistočne Evrope od kojih su aplicirale i dvije općine iz Federacije BiH i to Općina Novo Sarajevo i Općina Tešanj. Istakao je da će pet najbolje ocjenjenih prijava dobiti GENiYOUTH nagradu lokalne inicijative, te da će biti pozvani na svečanu dodjelu nagrada i predstavljanje nagrađenih inicijativa u gradu Plovdiv (Bugarska), u maju 2015. godine.

Predsjedništvo Saveza je primilo k znanju ove informacije.

10. Prijedlog za sazivanje sjednice Skupštine Saveza

G-đa Vesna Travljanin je istakla da po Statutu Saveza Predsjedništvo donosi prijedlog za sazivanje Skupštine, te je istakla da je kontaktirala predsjedavajućeg Skupštine u vezi sa ovim pitanjem. Dodala je da će se sjednica Skupštine Saveza održati početkom juna/lipnja u Neumu ili u nekoj drugoj općini koja izrazi interes da bude domaćin Skupštine.

Predsjedništvo Saveza je usvojilo prijedlog za sazivanje sjednice Skupštine Saveza.

11. Tekuća pitanja

- a) Izmjena predstavnika Saveza u Savjetu Federalnog fonda za pomoć poplavljenim područjima (Željko Josić), izmjena predstavnika Saveza u Upravnom odboru projekta hitnog oporavka od poplava u BiH (Rasim Omerović) i izmjena predstavnika Saveza u Komisiji za izradu Zakona o državnim službenicima i namještenicima u organima uprave i upravnim organizacijama Tuzlanskog kantona (Rasim Omerović)

Po ovoj tački dnevnog reda Predsjedništvo Saveza je usvojilo da u navedenim tijelima ostanu iste općine, odnosno da novoizabrani načelnici preuzmu mjesto svojih prethodnika.

- b) Pravilnik o postupku direktnog sporazuma vezano za Zakon o javnim nabavkama

G-đa Selma Fišek je informisala Predsjedništvo da je početkom primjene novog Zakona o javnim nabavkama, Savez postao ugovorni organ po ovom Zakonu, te da je dužan provoditi postupke javnih nabavki propisane zakonom. Istakla je da ovaj Pravilnik predstavlja jedan od podzakonskih akata koje Savez treba usvojiti.

Predsjedništvo Saveza je jednoglasno usvojilo/dalo saglasnost na Pravilnik o postupku direktnog sporazuma.

Nakon konstatacije da su sve tačke dnevnog reda iscrpljene, g-din Ivo Jerkić je zatvorio Sedmu sjednicu Predsjedništva Saveza u 13 sati i 38 minuta.

Zapisnik sačinila
Selma Fišek, s. r.

Predsjednik Predsjedništva Skupštine Saveza

Ivo Jerkić, s. r.